

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
OPĆINA NOVI GRAD SARAJEVO  
Općinsko vijeće

Broj:01-02-141588/22  
Sarajevo, 30.06.2022. godine

## **OPĆINA NOVI GRAD SARAJEVO**

### **OPĆINSKI NAČELNIK**

PREDMET: Vijećnička pitanja i inicijative, dostavlja se

Na 16. radnoj sjednici Općinskog vijeća općinski vijećnici postavili su nekoliko vijećničkih pitanja odnosno pokrenuli su vijećničke inicijative sljedećeg sadržaja:

a) Vijećničke inicijative

#### **-vijećnica Maja Muftić Dedović-**

1. Iniciram da se pokrene procedura za izgradnju odnosno smještanje autobuske stanice na lokaciji Dobrinja između Bulevara branilaca Dobrinje i Bulevara Mimara Sinana. Na osnovu slika u prilogu je vidljivo da su trenutni uslovi za pješake nezadovoljavajući, te da se direktno iz autobusa izlazi na zelenu površinu, koja se u konačici pretvorila u utabanu zemlju što predstavlja posebno nepogodnu okolnost tokom kišnih perioda godine.
2. Pokrećem inicijativu da se u skladu sa dopisom i održanim sastankom sa Udruženjem za sprječavanje siromaštva Ruke uspostavi saradnja povodom projekta „Socijalna prodavnica“.Priroda projekt je cirkulacija dobara između lokalnih proizvođača, sa područja opštine Novi Grad Sarajevo i socijalno ugroženih kategorija stanovništva, sa planom održivosti i rasta profitabilnosti lokalne proizvodnje.
3. Pokrećem inicijativu da se saniraju oštećenja asfalta u ulici Ibri Ćeske kod brojeva 49 i 45.

#### **-vijećnik Adi Škaljić-**

1. Upućujem vijećničku inicijativu za dostavljanje cjelovite informacije o realizaciji izgradnje dječijeg igrališta u ulici Esada Midžića, kod broja 64.

**OBRAZLOŽENJE**Radovi na ovom gradilištu su već neko vrijeme obustavljeni, a na informativnoj tabli je navedeno daje investitor Općina Novi Grad Sarajevo, a da je planirani završetak radova 31.12.2021. godine. Stanovnike ovog naselja zanima šta se dešava sa projektom i postoje li planovi za nastavak realizacije.

2. Upućujem vijećničku inicijativu za uspostavljanje programa podsticaja (potpore) preduzećima i obrtima za uvođenje inovacije u proizvodni proces.

#### OBRAZLOŽENJE

Ekonomski razvoj bez inovacija i jačanja produktivnosti postao je nemoguć. Preduzeća u privatnom vlasništvu i obrti jedni su od najznačajnijih pokretača privrede, jer se u sistemima nepovoljnim za poduzetništvo, moraju osloniti na vlastitu kreativnost i stvaranje inovacija. Na sreću, u savremenoj ekonomiji upravo su to najznačajniji resursi. Kreativnost i inovatorstvo su osnova za postizanje prednosti na tržištu ili, u najmanju ruku, održavanja koraka sa konkurencijom. Poticanjem i podrškom inovativnim proizvodima i praksama naša općina može postići veći ekonomski rast i razvoj. Kroz ovaj program razvijala bi se i društvena svijest o dugoročnoj vrijednosti istraživanja, razvoja znanja i vještina, kreiranja novih praksi i inovatorstva. Zbog svega navedenog, smatram da Općina Novi Grad Sarajevo, kao zalag za budućnost, treba početi i na praktičan način nagrađivati i popularizirati inovatorski duh svojih privrednika i obrtnika. Uspostavu sistema valorizacije aplikantata na ovaj program, trebalo bi uraditi u saradnji sa Asocijacijom inovatora BiH (AIBiH).

#### **-vijećnik Alem Logo-**

Inicijativa – “Besplatni udžbenici za novogradske osnovce od prvog do četvrtog razreda”

Pokrećem inicijativu prema službi za obrazovanje općine Novi Grad Sarajevo, s ciljem besplatne nabavke udžbenika za novogradske osnovce, od prvog do četvrtog razreda.

Obrazloženje :Prateći pozitivan trend Ministarstva za osnovno i srednje obrazovanje Kantona Sarajevo o nabavci besplatnih udžbenika za osnovce Kantona Sarajevo od 5. Do 9. razreda, kao i stalni porast inflacije, mišljenja sam da je ovakva inicijativa veoma dobra stvar i da ćemo na ovaj način finansijski u mnogome olakšati ionako visoku potrošačku korpu naših građana. Zamoliću službu za obrazovanje općine Novi Grad da nam dostavi tačan broj osnovaca od 1. Do 4. Razreda na našoj općini, kao i finansijski iznos neophodnih sredstava za sprovedbu navedene inicijative.

Također, za navedenu inicijativu tražim izjašnjenje kolegica i kolega vijećnika.

#### **-vijećnica Enisa Spahić-**

#### 1.INICIJATIVU ZA MAPIRANJE DIVLJIH DEPONIIJA SMEĆA NA PODRUČJU OPĆINE NOVI GRAD

Molim nadležne službe da izvrše mapiranje divljih deponija smeća kako bi se već u narednom period akcije čišćenja u saradnji sa JKP “ Rad” i JP “ Lokom” uklonile sa područja naše općine čime bi se stvorili preduoslovi za ljepši i sigurniji ambijent življenja.

2. Šta se uradilo do sada na edukaciji i podizanju kolektivne svijesti o značaju zaštite životne sredine, a koje mjere su do sada poduzete da se sankcionišu oni koji proizvode divlje deponije smeća?

3. Imaju li nadležne službe plan zamjene starih, azbestnih, kancerogenih vodovodnih cijevi na području Općine Novi Grad?“

Prema nezvaničnim informacijama na području naše općine ima više od 35 % starih azbestnih vodovodnih cijevi. Napomenula bih da se desilo puknuće glavne vodovodne cijevi u ulici Branislava Nušića čiju vodu koriste i učenici najmnogobrojnije osnovne škole „Aleksa Šantić“, prije nešto više od mjesec dana, tom prilikom cijev je zakrpljene. Nadam se da će prioritet zamjene upravo biti azbestne vodovodne cijevi koje snabdijevaju škole, vrtiće, ambulante i sl.

#### **-vijećnik Adis Šahmanija-**

1. Podnosim inicijativu za rekonstrukciju krova na objektu MZ Naselje heroja Sokolje.

Naime prostorije MZ u čijim prostorijama je smještena i ambulanta prokišnjavaju, što stvara probleme u radu kako ljekara tako i uposlenika i korisnika prostorija MZ.

2. Podnosim inicijativu za izgradnju dječijeg igrališta kod rezervoara u Naselju heroja Sokolje.

Na pomenutoj lokaciji je Općinsko zemljište i na tom prostoru gravitira veliki broj djece iz naselja ali i susjedne MZ Briješće. Kako u blizini nema dječijih igrališta smatram da je neophodna izgradnja istog na pomenutoj lokaciji.

3. Podnosim inicijativu za izgradnju invalidne rampe za Ibrahimović Samiru u ulici Asafa Sokolovića.

Naime pomenuta osoba je majka dvoje djece i oboljela je od distrofije mišića, invalid je 90%, kako bi mogla nastaviti koliko, toliko normalan život neophodna je izgradnja prilazne rampe do kuće.

#### **-Komisija za ravnopravnost spolova-**

Inicijativa za izradu Gender Akcionog plana Općine Novi Grad Sarajevo koji je istekao 2015. godine. Nosilac aktivnosti, u skladu sa Poslovníkom OV, bila bi Komisija za ravnopravnost spolova sa nadležnom Službamom, institucijama i različitim akterim usmjerenih ka ravnopravnosti spolova i osnaživanju žena na lokalnom nivou. **(Usvojena od strane Općinskog vijeća)**

#### **-vijećnik Jasmin Smječanin-**

1. Savjet mjesne zajednice „Alipašin Most I“ traži od Ministarstva saobraćaja Kantona Sarajevo tačne i precizne informacije o datumu nastavka radova na izgradnji kružnog toka IX transverzale.

Obrazloženje: U prostorije Mjesne zajednice „Alipašin Most I“ svakodnevno dolaze stanovnici Mjesne zajednice koji se žale na zapušteno gradilište kružnog toka i blokiranje nastavaka izvođenja radova na izgradnji kružnog toka IX transverzale. Pored neadekvatnog izgleda i otežanog kretanja motornih vozila i pješaka, gradilište predstavlja i veliku opasnost za građane zbog neadekvatne ograđenosti. Građani mjesne zajednice najavljuju jednosatno blokiranje saobraćaja u ulici Safeta Zajke, što bi izazvalo potpuni kolaps u saobraćaju, a ukoliko ni to ne bude uticalo na početak izvođenja radova građani su spremni i na radikalnije mjere u vidu protesta i višesatnih blokada. Mjesna zajednica Vam se obraćala više puta za dostavljanje informacija o projektu IX transverzale i nastavku radova na izgradnji kružnog toka, ali bez tačnih i preciznih odgovora, već uvijek ono što je općepoznato, ali neprihvatljivo za stanovnike ovog i okolnih naselja.

2. Incijativu za postavljanje kamera na sljedećim lokacijama:

- Safeta Zajke
- Raskrsnica Smaila Šikala i Ragiba Džinde
- Okretaljka autobusa u ulici Smaila Šikala

**-vijećnik Aida Ožegović-**

1. Podnosim inicijativu za uređenje parka na tunelu, Dobrinji, naselje C5.

Obrazloženje: Na navedenom lokalitetu su postavljene dvije klupe koje su nedovoljne za ovaj park te vam se obraćam sa inicijativom da se pored postojećih postave još dvije klupe, da se postave i dodatne dvije kante za otpatke, da se dopuni postojeći mobilijar za djecu i da se ispod istog uredi podloga od pijeska ili šljunka. U navedenom parku je potrebno uraditi i forestaciju. Napominjem da je u naselju C5 ovo je jedini park. Molim da se inicijativa prosljedi nadležnim službama, KJKP Park i KJKP Rad.

2. Uspostavljanje pijace Dobrinja i uklanjanje prodajnih punktova ispred Merkatora

Obrazloženje: Dobrinja je veliko naselje kojem je potrebna pijaca (voće i povrće). Prije više godina u navedenom naselju je postojala zelena pijaca koja je trenutno zatvorena, tj. postoji jedan prodajni sto. Voće i povrće se prodaje na Bulevaru ispred Merkatora. Stolovi koji se koriste su jako neugledni, odudaraju od ostatka naselja, prodavci ne vode računa o komunalnoj higijeni što se može vidjeti iz fotografija. Molim da se preispitaju dozvole za rad prodavcima i da se isti upute za rad u sklopu objekta u kojem je ranije bila smještena pijaca.

3. Sanacija horizontalnih usporivača saobraćaja duž ulice Bulevar Mimar Sinana

Obrazloženje: Stanovnici naselja Dobrinja su više puta upućivali apel i inicijative preko društvenih mreža, Savjeta MZ na Dobrinji i vijećnika u općinskom vijeću NG za sanaciju navedene ulice, uklanjanje usporivača saobraćaja i postavljanje pješačkih ostrva i kamera za mjerenje brzine ali su dobili odgovor da je u planu rekonstrukcija kompletne saobraćajnice te da se na tom dijelu ne mogu postaviti kamere pa se obraćam u ime svih stanovnika Dobrinje da se privremeno izvrši sanacija postojećih horizontalnih usporivača saobraćaja koji su velika opasnost za vozače i pješake, a izazivaju i materijalnu štetu na vozilima.

4. Postavljanje pješačkog prelaza za invalidne osobe

Obrazloženje: Obraćam se Zahtjevom za izgradnju pješačkog prelaza za invalidne osobe, tj. smanjenje visine trotoara u ulicama Oslobodilaca Sarajeva prema ulici Janka Jolovića, također pješački prelaz Marka Oreškovića prema ulici Mustafe Kamerića, izlaz iz ulice Vahide Maglajlić i Miroslava Krleže preko Bulevara Mimar Sinana. Sve navedeno u opisu možete pogledati na fotografijama ispod, a za dodatne nejasnoće stojim na raspolaganju.

5. Pokrećem inicijativu za preispitivanje Plana i Saglasnosti za proširenje 12. transferzale.

Obrazloženje: Molim da mi se u što kraćem roku dostave informacije o planu proširenja 12. transferzale. Da li je planirano da se 12. transferzala proširi sa dodatne dvije trake prema Međunarodnom aerodromu ili prema naselju?

Da li je plan proširenja 12. transferzale u Regulacionom planu Dobrinje?

Da li je Općina Novi Grad izdala dozvolu za građenje?

### **-vijećnik Mirza Selimbegović-**

1. Poznato je da su u budžetu za 2022 izdvojena sredstva za dom kulture u Ahatovicima, Pitanje je šta se do sada uradilo i kada očekujemo realizaciju i završetak projekta?

2. Obzirom da imamo nekoliko požara koji su pogodili stanovnike naše općine gdje je često i velika šteta zašto još uvijek nije urađena naknada štete? Inicijativa je da se sto hitnije izvrši naknada štete.

3. Inicijativa prema nadležnoj Službi da dostavi broj šehidskih porodica i porodica poginulih boraca kojima je dodijeljena jednokratna pomoć (hedije) i da se omogući uvid u spisak općinskim vijećnicima koji budu to zahtijevali.

### **-vijećnik Adis Pljevljak-**

1. Nakon što su početkom juna izvršene aktivnosti na suzbijanju krpelja na području Novog Sarajeva, Općina Novo Sarajevo je putem Službe za civilnu zaštitu nastavila aktivnosti na tretiranju zelenih površina, te početkom ove sedmice obavila i deviperaciju na više lokacija na području ove lokalne zajednice. Radi se o procesu odbijanja zmiya i gmizavaca upotrebom repelenta, modernih hemijskih sredstava, a sve u cilju povećanja bezbjednosti i zaštite zdravlja ljudi i životinja. Kao što je to uradila susjedna Općina, podnosim inicijativu da i naša općina uradi istu stvar na svim mjestima koje podliježu eventualnim opasnostima po građane.

2. Inicijative za poboljšanje uslova života građana Mjesne zajednice Aneks

- Zbog tranzitnog saobraćaja i velike frekvencije vozila ul. Safeta Hadžića je po naše građane veoma opasna. Semafor vrlo često ne radi a i kad radi frekvencija je takva da je nemoguće preći ulicu-postoji li mogućnost svjetlosnog ili zvučnog tastera za prelazak;

- Loše postavljene kontejneri na dijelu ulice Safeta Hadžića gdje je nemoguće preći ulicu (neki dan je poginuo komšija) postoji li mogućnost pješačkog prijelaza i ležećeg policajca;

- Neuređena trolejbuska stanica prema gradu sa rupama u asfaltu i bez nadstrešnice – dopis GRASU i uređenje stanice i asfaltiranje trotoara

- Adekvatno održavanje i uređenje ulice Vrbovska od broja 5 pa do Ef Džabića čikme ,ulica je sa rupama u asfaltu , vrlo rijetko se pomete i to samo sredina a od rata nije oprana; Neophodno je asfaltirati ili barem popraviti rupe i JKP Rad da redovno održava (mete i pere šmrkom)

- Realizacija hortikulturalnog uređenja Vrbovska ulazi 5,7,9,11 dio iza zgrade koji je prema ulici Safeta Hadžića. JU KP“Park“ je u aprilu bez dozvole stanara iskopali i odnijeli (otuđili) ukrasno grmlje i ruže zgrade i tako ostavili stanare izložene buci i prašini sa jedne od najprometnijih ulica u gradu ( grmove i sadnice su stanari kupili i nje govali 40 godina );

- Izgradnja parka za djecu/stara lica koji bi se mogao dodati/ proširiti na osnovni dio parkića pored zgrade MZ“Aneks“;

- Inicijativa za asfaltiranje staze pored trafo stanice na Aneksu koja vodi prema stepenicama.

-Inicijativa da se u ulici Vrbovska (od broja 5 do broja 11) postave ležeći policajci.

-Inicijativa da se napravi igralište-park za djecu u blizini O.Š. „Aneks“

-Inicijativa da se građanima u ulici Vrbovska podijele kante za smeće.

-Inicijativa za asfaltiranje/rekonstrukciju cijele ulice Vrbovska.

-Inicijativa da se gradski saobraćaj prema Aneksu uspostavi na svakih pola sata.

- Inicijativa za postavljanje kežećoih policajaca u ulici Prijedorska do br. 23 i pješački prelaz od br. 19 do br. 23.

#### **-vijećnik Abel Baltić-**

Pokrećem inicijativu za promjenu dijela ulice Olimpijska koja prolazi ispod škole Gazaz od kružnog toka do ulice Safeta Hadžića u naziv Hussein Bakry Gazzaz.

#### **-vijećnica Edita Šandal-**

1. U ime Savjeta MZ Dobrinje A podnosim inicijativu prema nadležnima iz Cesta FBiH i Ministarstva prometa i komunikacija FBiH da se osigura sigurniji izlaz i prilaz aerodromu namijenjen za pješake i turiste, u ulici Kurta Schorka

Obrazloženje: U ulici Kurta Schorka na samom izlazu sa aerodroma potrebno je sigurnije riješiti ulaz i izlaz namijenjen za pješake tj.turiste.Potrebno je napraviti trotoare kojih sada nema, ili neki dodatni pješački prelaz.Trenutno pješaci prelaze ulicu na kojoj nema obilježen pješački prelaz, što je veoma opasno, te ulaze u Aerodromsko naselje zemljanim putem.Također na samoj glavnoj ulici svakodnevno možemo vidjeti parkirane automobili koji čekaju putnike, te isti ti automobili ugrožavaju sigurnost drugih učesnika u saobraćaju.Poznato nam je da je planirano proširivanje ove magistralne ceste, ali dok se to ne realizuje potrebno je napraviti neko bar privremeno sigurnije rješenje kako bi se zaštitili pješaci i turisti, te da ne bi došlo do saobraćajnih nesreća.Također, pozivamo stručne osobe iz oblasti saobraćaja da izađu na teren i daju svoje sugestije tj.mišljenje šta je na ovom prelazu najbolje uraditi, kako bi osigurali sigurnost svih učesnika u saobraćaju.Ovo je hitno jer ubrzo počinje ljetna sezona, te veliki broj turista cirkuliše na aerodromu i ulazi u Aerodromsko naselje. **(ponovljena inicijativa)**

2.Podnosim vijećničku inicijativu za iscertavanje pješačkog prelaza u ulici Braće Mulić (kod drvenog Azela) Aerodromsko naselje U ulici Braće Mulić tačnije kod „drvenog Azela“ na kojoj se nalaze 4 saobraćajne trake, ne postoji obilježen pješački prelaz preko ulice koja je jako prometna i gdje pješaci često pretrčavaju cestu. Stanovnici Aerodromskog naselja najviše koriste taj put koji vodi prema naselju Mahala i džamiji u koju djeca idu u mekteb. Zbog sigurnosti pješaka i svih učesnika u saobraćaju predlažem da se hitno obilježi pješački prelaz na ovoj lokaciji, kako ne bi došlo do stradanja pješaka.

3. Podnosim vijećničku inicijativu da se nakon završetka radova na vodovodnoj mreži u ulici Briješće brdo i asfaltiranja ceste, postave usporivači saobraćaja kod župe sv. Leopolda Bogdana Mandića i na dijelu ulice Vrandučka od broja 18 do spoja sa ulicom Briješće brdo. U ovim dijeloma ulica ima veliki broj djece čija sigurnost je svakodnevno ugrožena zbog nesavjesne vožnje pojedinih vozača.

4. Kada je planirana zamijenjena oštećenih sferna ogledala? Na pojedinim lokacijama ogledala nisu funkcionalna i po nekoliko mjeseci što ugrožava sigurnost i povećava rizik za saobraćajne nesreće.

5. Pitanje za VIK: Da li možemo dobiti informaciju zbog čega građani gornjeg dijela ulice Brezanska i Briješće brdo imaju problema sa vodosnadbjevanjem. Stanovnici ovih ulica nikada ranije nisu imali problema sa vodosnadbjevanjem međutim u posljednje vrijeme smo dobili više žalbi građana da im nestaje vode. Ova ulica se nalazi ispod ulice Kralja Stjepana Tomaševića i NE nalazi se iznad kote vodosnadbjevanja, te je očito razlog neke druge prirode.

SEKRETAR  
OPĆINSKOG VIJEĆA

Elvir Kosovac, dipl. pravnik

DOSTAVITI:

1. Naslovu
2. Predsjedavajući Općinskog vijeća
3. a/a